

Politica: Con e sentencia na Hulanda lo influencia nos

ORANJESTAD(AAN):E

siman aki politica den Reino Hulandes tabata cabes abou, relaciona cu dos sentencia den Corte.

Ta trata aki di e veredicto cu a cay den Hoge Raad na Den Haag relaciona cu e caso cu ex Parlamentario dr. Rudy Lampe a entama contra ex Minister Drs. Booshi Wever. Tambe pa e veredicto den e caso cu e comunidad Islam a entama contra Parlamentario Geert Wilders.

E pregunta cardinal ta, con e dos sentencia nan aki awor lo influencia politica na Aruba? Ambos caso tin di haber cu comportacion di politiconan den nos comunidad.

Ambos tin di haber cu loke nan ta considera nan libertad di expresion. Pero den ambos caso tin un otro partido cu ta sinti cu nan derecho ta wordo limita pa duna "mas" derecho na e politico.

Y ta precisamente aki Huez a tuma un decision na banda di e politiconan, moviendo e frontera di aceptacion mas ainda.

No ta sigur cu ta esaki ta locual comunidad ta desea, pero en todo caso esaki ta locual e leynan existente ta permiti si.

Den e veredicto den Hoge Raad na Hulanda, Corte ta haya cu inmunidad Parlamentario ta un asunto sagrado y cu ningun Hues por torno na dje. Riba su mes esey ta un realidad cu tur hende ta na altura di dje pa hopi aña caba.

Pero temponan a cambia y locual un Parlamentario (of Minister) bisa den Parlamento ya no ta keda eyden mas.

Transmision di radio, television, internet of prensa skirbi ta pone cu den algun seconde despues of tin biaha hasta den forma "bibo" ta transmiti e mensahe na mundo henter.

Pues aunke un politico bisa algo den Parlamento, e mesun mensahe ey ta yega afo den un rato di tempo y mescos ta e consecuencia tambe di e locual a keda bisa. Asina por ehempel ex Minister drs. Booshi Wever a tilda ex Parlamentario dr. Rudy Lampe di ta un "pedofiel" durante pleno reunion publico den Parlamento pa tratamiento di presupuesto alternativa.

E ex Parlamentario, conoci den comunidad pa tabata un ex Pastoor, no a aprecia y a sinti cu e acusacion serio aki ta atacha su bon nomber y hasta esun di clero catolico den comunidad.

El a bay Corte y na dado momento un Huez a haya cu e ex Parlamentario tin rason. E Huez den Corte di Prome Instancia a haya cu e inmunidad Parlamentario no por keda traduci como "libertinahe".

Corte a tene na cuenta cu e topico di discusion na e momento ey no tabatin nada di haci cu e comentario duna door di ex Minister Wever y como tal a dicta fayó.

Sinembargo Corte Comun di

Antiyas y Aruba (3 Hues) a opina lo contrario y mescos Corte di Casacion na Hulanda, kendenan ta di opinion cu inmunidad no tin limite!

Den e caso particular di Parlamentario Geert Wilders, el a produci un pelicula cu segun e comunidad Islam, ta atacha nan imagen.

E pelicula a ricibi atencion internacional y mescos ta e rabia di miembronan Islam di rond mundo contra e politico Hulandes.

Geert Wilders tin problema serio cu e tradicion di e religion Islam y di nan custumbrenan. E ta boga pa saca tur for di Hulanda, basa riba e forma cu e ciudadanonan en particular ey ta bisti y actua den publico.

E ciudadanonan Islam na Hulanda a busca un abogado y a demanda e politico. Corte siman pasa a duna su veredicto na favor di Geert Wilders bisando cu berdad su comentarionan ta ofensivo y insultativo pero no cu por considera cu nan ta lanta pueblo contra otro.

Esaki basa riba e acusacion di e comunidad Islam cu ta bisa cu e acusacionnan di e Politico Hulandes ta lanta hende contra nan, promoviendo rabia innecesario contra nan creencia.

Interesante den e veredicto ta e parti unda e Magistrado ta bisa cu politiconan mester por goza di "poco mas"

libertad den debatenan publico pa motibo di nan trabou. Tambe cu como politico Wilders tin derecho di critica y di cuestiona un religion.

Su critica no ta contra e hendenan directamente, sino contra nan religion y custumbrenan.

Y Corte ta considera cu Wilders tin derecho di no gusta nan religion y nan tin derecho pa no ta di acuerdo cu e pensamiento di e politico.

Cu si pueblo ta acepta e pensamiento of no awor no ta e caso, pasobra de facto Wilders a crece enormemente durante e ultimo eleccion Parlamentario na Hulanda.

E tempo ey e caso a cuminsa caba, pues envez di afekt'e, el a yud'e den cierto sentido.

Cu e decision di Corte e comunidad Islam ta mas rabia ainda y a anuncia di lo evalua pa apela e decision di Corte.

Pa Aruba e decisionnan di Corte aki sin duda lo tin su repercusion, specialmente pasobra ta notando, mescos cu na Hulanda tambe, cu asina argumentonan caba cu mas y mas ta recorri e caminda di atakenan per-

sonal, baho y denigrante.

No mas cu algun dia pasa un lider di partido ta tilda otro di no ta yiu di su tata, un asunto cu no tin nada di haber cu politica of cu ningun sorto di debate publico.

E mesun declaracion haci den Parlamento contra dr. Rudy Lampe tampoco no tin nada di haci cu politica.

Ta uza e tipo di atakenan asina cu un solo meta pa atacha imagen di e opositor politico. Tur esaki sin kita for di e punto di bista cu awor tin un desaroyo nobo den politica, cu comentarionan cu no por para pa nan como politico individual, ta manda nan bou di capa di partido of di henter e fraccion of awo te hasta di organisacionnan cu ta traha na vanguardia di un politico individual.

Probablemente ambos veredicto ta den cuadro di nos leynan existente y Corte tin su motibo pa a yega na dicho verediconan.

Pero cu nan lo tin consecuencia pa e nivel di politica ta sigur, loke nos no ta sigur di dje ta cu si e consecuencia lo ta pa halza e nivel of ta pa baha e nivel di debate un poco mas!

Telefonan di DIARIO
582-6747
Fax: 582-8551